

25/07/1999

Razaleigh tiada tujuan raih undi

MACHANG: Pengerusi Badan Perhubungan Umno Kelantan, Tengku Razaleigh Hamzah, menyifatkan kenyataannya meminta maaf secara terbuka di hadapan Perdana Menteri, Datuk Seri Dr Mahathir Mohamad, semalam, sebagai ikhlas dan tidak bertujuan untuk meraih undi menjelang pilihan raya.

"Saya dengan ikhlas minta maaf dan ia bukan sesuatu yang boleh kita main-main bila kita minta maaf dengan orang. Ini dengan ikhlas hati kita minta maaf," katanya.

Menurutnya, beliau meminta maaf kepada Dr Mahathir terhadap sebarang kesalahan yang dilakukan sebelum ini ketika Umno menghadapi pergolakan paling getir menyebabkan parti itu diharamkan pada 1987.

Beliau yang juga Ahli Parlimen Gua Musang berkata, kesilapan itu mungkin menimbulkan kemarahan di kalangan ahli Umno.

"Kemaafan itu perlu supaya saya boleh bekerja dengan lebih berkesan. Dia (Dr Mahathir) pun sedar mengenai perkara itu, diapun minta maaf dengan saya dan mencuit perasaan saya. Jadi, saya dah lupa semuanya," katanya kepada pemberita di majlis ramah mesra bersama rakyat di Pekan Pulau Chondong, dekat sini, petang kelmarin.

Beliau berkata demikian sebagai mengulas kenyataannya meminta maaf secara terbuka di hadapan kira-kira 2,000 orang di majlis perjumpaan Perdana Menteri dengan pemimpin dan ahli Barisan Nasional (BN), di sebuah hotel di Kota Bharu, dua hari lalu.

(END)